

## Persónuverndarstefna Landsvirkjunar

### Umsækjendur um störf

Landsvirkjun hefur einsett sér að tryggja áreiðanleika, trúnað og öryggi persónuupplýsinga umsækjenda um störf hjá félaginu. Persónuverndarstefnu þessari er ætlað að upplýsa umsækjendur um hvaða persónuupplýsingar félagið safnar og með hvaða hætti félagið nýtir slíkar persónuupplýsingar.

Persónuverndarstefna þessi nær til persónuupplýsinga er varða alla þá sem sækja um störf hjá Landsvirkjun, einnig um sumarstörf. Í stefnunni er jafnframt vísað til umsækjenda sem „þín“ og félagsins sem „okkar“.

### 1. Tilgangur og lagaskylda

Landsvirkjun leitast við að uppfylla í hvívetna persónuverndarlöggjöf og er stefna þessi byggð á lögum nr. 90/2018 um persónuvernd og vinnslu persónuupplýsinga („**persónuverndarlög**“).

### 2. Hvað eru persónuupplýsingar?

Persónuupplýsingar í skilningi stefnu þessarar eru hvers kyns upplýsingar um persónugreindan eða persónugreinanlegan einstakling, þ.e. upplýsingar sem hægt er að rekja beint eða óbeint til ákveðins einstaklings. Gögn sem eru ópersónugreinanleg teljast ekki persónuupplýsingar.

### 3. Persónuupplýsingar sem Landsvirkjun safnar og vinnur

Við söfnum og varðveitum ýmsar persónuupplýsingar um umsækjendur og fer vinnsla og söfnun að hluta til eftir eðli þess starfs sem sótt er um.

Eftirfarandi eru dæmi um upplýsingar sem Landsvirkjun safnar um umsækjendur:

- samskiptaupplýsingar, svo sem nafn, kennitala, heimilisfang, símanúmer og tölvupóstfang;
- starfsumsóknir;
- ferilskrá og upplýsingar um menntun, þjálfun og starfsreynslu;
- upplýsingar frá umsagnaraðilum og ráðningarskrifstofum eftir atvikum; og
- upplýsingar úr starfsviðtölum.

Auk framangreindra upplýsinga kann Landsvirkjun einnig að safna og vinna aðrar upplýsingar sem þú lætur félaginu í té í umsóknarferlinu. Fyrir nánar tiltekin störf kunnum við að biðja umsækjendur að gangast undir persónuleikapróf.

Að meginstefnu til aflar Landsvirkjun persónuupplýsinga beint frá þér, en við kunnum að óska eftir upplýsingum frá umsagnaraðilum sem þú tilgreinir í umsókn þinni. Í öðrum tilvikum þar sem persónuupplýsinga er aflað frá þriðja aðila mun félagið leitast við að upplýsa þig um slíkt.

Ef til þess kemur að þér verði boðið starf hjá félaginu kann félagið að óska eftir afriti af eða upplýsingum úr sakavottorði þínu í tengslum við nánar tiltekin störf, áður en gengið er frá ráðningarsamningi.

#### **4. Hvers vegna söfnum við persónuupplýsingum og á hvaða grundvelli?**

Við söfnum persónuupplýsingum um umsækjendur fyrst og fremst til að leggja mat á hæfni viðkomandi til að gegna því starfi sem um ræðir.

Þær persónuupplýsingar sem við vinnum með um þig eru unnar í tengslum við umsókn þína um starf hjá félaginu, þ.e. á grundvelli beiðni þinnar um að gera samning við félagið.

Í þeim tilvikum sem óskað er eftir sakavottorði er það gert á grundvelli lögmætra hagsmuna félagsins, enda er starfið þess eðlis að hagsmunir félagsins af því að fá upplýsingar úr sakavottorði vega auðsjáanlega þyngra en hagsmunir umsækjanda af því að halda upplýsingunum leyndum.

Það skal tekið fram að veitir þú Landsvirkjun ekki umbeðnar upplýsingar í ráðningarferli getur það leitt til þess að félagið getur ekki ráðið þig til starfa.

#### **5. Aðgangur að persónuupplýsingum og miðlun til þriðju aðila**

Innan Landsvirkjunar takmarkast aðgangur að upplýsingum um umsækjendur við mannauðssvið félagsins og stjórnendur og yfirmenn þess starfs sem sótt er um. Sé notast við ráðningarskrifstofu í ráðningarferlinu hefur ráðningarskrifstofan jafnframt aðgang að upplýsingum um umsækjendur sem þriðji aðili.

Landsvirkjun kann einnig að miðla takmörkuðum persónuupplýsingum um umsækjendur til umsagnaraðila. Þá gæti persónuupplýsingum þínum verið miðlað til þriðju aðila sem veita félaginu upplýsingatækniþjónustu.

Landsvirkjun mun ekki miðla persónuupplýsingum þínum utan Evrópska efnahagssvæðisins nema slíkt sé heimilt á grundvelli viðeigandi persónuverndarlöggjafar, s.s. á grundvelli staðlaðra samningsskilmála eða auglýsingar Persónuverndar um ríki sem veita persónuupplýsingum fullnægjandi vernd.

Persónuupplýsingar um þig kunna að vera afhentar þriðja aðila að því marki sem heimilað er eða krafist er á grundvelli viðeigandi laga eða reglna, s.s. til Þjóðskjalasafns. Einnig kann persónuupplýsingum þínum að vera miðlað til þriðja aðila til að bregðast við löglegum aðgerðum eins og hútleitum, stefnum eða dómsúrskurði. Afhending getur einnig verið nauðsynleg í neyðarástandi eða til að tryggja öryggi starfsmanna Landsvirkjunar eða þriðja aðila.

#### **6. Hvernig er öryggi persónuupplýsinga tryggt?**

Landsvirkjun er vottað fyrirtæki samkvæmt staðlinum ISO 27001 um stjórnkerfi upplýsingaöryggis. Umfang vottunar nær til allra starfsmanna og allrar starfsemi í höfuðstöðvum fyrirtækisins.

Landsvirkjun leitast við að grípa til viðeigandi tæknilegra og skipulegra ráðstafana til að vernda persónuupplýsingar þínar. Þessum ráðstöfunum er ætlað að vernda persónuupplýsingar gegn því að þær glatist eða breytist fyrir slysi og gegn óleyfilegum aðgangi, afritun, notkun eða miðlun þeirra.

Umsóknir og önnur gögn tengd ráðningarferlinu eru geymd á rafrænu formi og vistaðar í tölvukerfi Landsvirkjunar sem er aðgangsstýrt. Pappírseintökum af umsóknum og fylgigögnum þeirra umsækjanda sem kallaðir eru í viðtal er eytt að ráðningarferli loknu.

#### **7. Varðveislutími**

Þar sem Landsvirkjun er afhendingarskyldur aðili á grundvelli laga nr. 77/2014 um opinber skjalasöfn er félaginu óheimilt að ónýta eða farga nokkru skjali sem fellur undir gildissvið laganna, nema með heimild þjóðskjalavarðar.

## 8. Breytingar og leiðréttingar á persónuupplýsingum

Það er mikilvægt að þær persónuupplýsingar sem Landsvirkjun vinnur með séu bæði réttar og viðeigandi. Á meðan á umsóknarferlinu stendur er því mikilvægt að þú tilkynnir félaginu um allar breytingar sem kunna að verða á þeim persónuupplýsingum sem þú hefur látið okkur í té.

Vinsamlega beinið öllum uppfærslum til Sturlu J. Hreinssonar, mannauðsstjóra félagsins.

## 9. Réttindi þín hvað varðar þær persónuupplýsingar sem félagið vinnur

Þú átt rétt á að fá staðfest hvort við vinnum persónuupplýsingar um þig eða ekki, og ef svo er getur þú óskað eftir aðgangi að upplýsingunum og upplýsingum um hvernig vinnslunni er hagað. Þá kann einnig að vera að þú hafir rétt á að fá afrit af upplýsingunum. Við ákveðnar aðstæður getur þú farið fram á það við félagið að við sendum upplýsingar, sem þú hefur sjálf/ur látið okkur í té eða stafa frá þér, beint til þriðja aðila.

Í ljósi þess að Landsvirkjun er afhendingarskyldur aðili, líkt og nánar er rakið í 7. gr. í persónuverndarstefnu þessari, er réttur þinn til eyðingar persónuupplýsinga takmarkaður. Þú kannt þó, við tiltekna aðstæður, að eiga rétt á að vinnsla persónuupplýsinga þinna verði takmörkuð, s.s. ef þú telur að upplýsingar þær sem Landsvirkjun vinnur um þig séu ekki réttar. Við þær aðstæður getur þú krafist þess að á meðan réttmæti upplýsinganna er kannað verði vinnsla þeirra takmörkuð.

Sé vinnsla á persónuupplýsingum þínum byggð á lögmætum hagsmunum félagsins átt þú einnig rétt á að mótmæla þeirri vinnslu.

Framangreind réttindi þín eru þó ekki fortaklaus. Þannig kunna lög að skylda félagið til að hafna ósk um eyðingu eða aðgang að gögnum. Þá getur félagið hafnað beiðni þinni vegna réttinda félagsins, s.s. á grundvelli hugverkaréttar, eða réttinda annarra aðila, s.s. til friðhelgi einkalífs, telji félagið þau réttindi vega þyngra.

Ef upp koma aðstæður þar sem við getum ekki orðið við beiðni þinni mun félagið leitast við að útskýra hvers vegna beiðninni hefur verið hafnað, þó með tilliti til takmarkana á grundvelli lagaskyldu.

## 10. Fyrirspurnir umsækjenda og kvörtun til Persónuverndar

Ef þú vilt nýta þér þau réttindi sem lýst er í 9. gr. í stefnu þessari, eða ef þú hefur einhverjar spurningar varðandi persónuverndarstefnu þessa eða það hvernig félagið vinnur með persónuupplýsingar þínar, vinsamlegast hafðu samband við Ingvar Christiansen, persónuverndarfulltrúa félagsins sbr. 11. gr. í stefnu þessari.

Ef að þú ert ósátt/ur við vinnslu félagsins á persónuupplýsingum getur þú sent erindi til Persónuverndar ([www.personuvernd.is](http://www.personuvernd.is)).

## 11. Samskiptaupplýsingar

Við höfum tilnefnt persónuverndarfulltrúa til að hafa umsjón með eftirfylgni þessarar persónuverndarstefnu. Hér fyrir neðan má finna samskiptaupplýsingar hennar:

Ingvar Christiansen  
[personuvernd@landsvirkjun.is](mailto:personuvernd@landsvirkjun.is)  
+354 515 9000

Samskiptaupplýsingar félagsins:

Landsvirkjun  
Háaleitisbraut 68  
103 Reykjavík

## 12. Endurskoðun

Landsvirkjun getur frá einum tíma til annars breytt persónuverndarstefnu þessari í samræmi við breytingar á viðeigandi lögum eða reglugerðum eða vegna breytinga á því hvernig félagið vinnur með persónuupplýsingar.

Allar breytingar sem kunna að verða gerðar á stefnunni taka gildi eftir að uppfærð útgáfa hefur verið birt á umsóknarvef Landsvirkjunar eða kynnt umsækjendum á annan sannanlegan hátt.

Persónuverndarstefna þessi kemur í stað upphaflegrar persónuverndarstefnu sem sett var þann 5. júní 2018.

Reykjavík, 7. október 2020.